

33.
Q. D. B. V.

ADAGIORVM
MEDICINALIVM
SYLLOGE

QVAM

SVB PRAESIDIO

IO. IAC. BAIERI
PHIL. ET MED. DOCT.

PRAX. BOTAN. ET CHIM. PROF. PVBL.
FACVLT. MED. SENIORIS H. T. DECANI
REIP. NORIMB. PHYSICI ET POLIATRI ALTORF.
NEC NON ACAD. NAT. CVRIOS.
COLLEGAE

*PATRONI AC PRAECEPTORIS SVI OMNI OBSER-
VANTIAE CVLTV AD CINERES VSQVE
COLENDI*

AD DISPVTANDVM PROPONET

IOHANNES EHINGER
AVGVSTANVS.

AD D. DEC. A. O R. *clolcccxvii.*

ALTORFII NORIC.

LITERIS IOD. GVIL. KOHLESII, ACAD. TYPOGR.

ΠΟΡΙΣΜΑΤΑ

A RESPONDENTE ADDITA.

I.

Nulli soli signo, nedum colori, in morbis plerisque est fidendum.

II.

Anima naturales etiam actiones dirigere videtur.

III.

Præfagia, quæ a subsultu variarum partium, a sternutamentis & aurium tinnitu desumuntur, superstitiosa & absurda sunt.

IV.

Prudentis est medici, morborum desperatorum curationem non aggredi, monente Hippocrate.

V.

Tempestiva remediorum variatio tam medico quam ægro sæpe plurimum conducit.

VI.

Sicuti medicus, qui morbos graves parvipendit, suam ignorantiam, sic levia quævis mala exaggerans, malitiam prodit.

VII.

Artem Medicam vix ulla perpetua recipere præcepta, recte Celsus judicavit, & inter alia sectionum Chirurgicarum exempla comprobant.

VIII.

Vnguibus maligna quædam & virulenta qualitas perperam tribuitur.

IX. Quod

I X.

Quod ultra vulgus sapiat , artemque divinam tractet medicus, in morbis occultis & latentibus ostendere inprimis potest.

X.

Ad auferendam corporis deformitatem ancipiti & molestæ curationi se subiicere, hominis nimium delicati est, prudentis autem viri eandem negligere.

XI.

Non omnia mali moris ulcera sunt insanabilia, uti ex adverso benigna quædam sanationem respuunt.

XII.

Inter magiam naturalem licitam, & superstitionem illicitamque certos statuere terminos, difficillimum est.

XIII.

Vti venenorum in genere, sic speciatim quæ ab animalibus proficiscuntur, obscura valde & dubia est ratio.

XIV.

Eandem morbi speciem nunc boni nunc mali moris esse posse, scabiei & cognatorum ipsi affectuum exemplo inprimis constat.



I.

Ex cute manifestum est.

A Iunt, *Pherecydem Syrium*, *Philosophum*, morbo *pediculari* laborasse; *Pythagora* autem accedente, et quomodo se haberet interrogante, digito per ianuam exserto, dixisse, καὶ δῆλα, i. e. *Ex cute manifestum est*. Hæc *Mich. Apostolius* (a). Eodem morbi genere consumptum *Pherecydem*, affirmant *Aristoteles* (b) et *Plutarchus* (c): *Plinius* (d) autem et *Apuleius* (e) copia serpentium ex corpore eius erumpente necatum perhibent, quod idem fortasse est, quoniam serpentium appellatio in universum genus insectorum non volatilium, adeoque & in pediculos competit. Cæterum *Diogenes Laërtius* (f), & ex hoc fortasse *Apostolius* l. c. commemorant, illam *Pherecydis* vocem in proverbium translatam, a Philosophis non nisi in malam partem accipi.

Liceret hæc occasione de *Phtiriasi* aut morbo *pediculari* sermonem instituere; nisi exempla & historiæ ipsius apud Medicos scriptores passim jam existerent: Quare magis allubescit dictum istud *Pherecydis*, ejusque ἀνεβείας applicare ad medicam de signis morborum doctrinam; in his enim eruendis sæpe solus color cutis ejusdemque aspectus sufficit, ut plane convictus de morbi genere & statu Medicus exclamare possit illud ipsum, καὶ δῆλα.

A

Ita

(a) Cent. XX. Proverb. 87. (b) Hist. animal. Lib. V. c. 31. (c) in Sylla cap. LXX. §. 2. (d) Lib. VII. cap. 51. (e) Florid. Lib. 11 (f) in vita *Pherecydis*,

Ita sane *Icterus* e flavo cutis, tum & oculorum colore vel solo patescit, *Chlorosis* ex pallido, unde etiam denominatur; *Variolas*, *morbillos*, *petechias*, aliasque *exanthematum* & *pustularum species*, non modo distinguui, sed & majus minusve periculum in singulis aestimari posse *ex coloris potissimum habitu*, nec vulgus ignorat. Quid quod ipse supremus & sapientissimus generis humani sospitator ac Medicus (g) per Moſen populo suo non certiora *lepræ dijudicandæ signa* suppeditavit, illis *a colore cutis carniū & pilorum* petendis.

Taceo & complures casus alios, in quibus *color & externus corporis habitus*, oculis facillime percipiendus, latentem morbi causam & morem manifesto prodit, sicut etiam *urinae*, & *a vena secta emissī sanguinis color* non pauca præbet valetudinis indicia, tametsi iis solis confidere, ceu vulgo fieri solet, minime sit consultum.

II.

Salivam movet.

Q Vanto magis trita est proverbialis hæcce phrasis, ut rem valde gratam designaturi, *salivam* hinc *movēri* pronunciemus, tanto minus solliciti erimus de adstruenda eiusdem autoritate. Nemo enim non in semetipso exploratum id habet, quod *a præsentia & conspectu alimenti suavioris, vel cibi fere cuiuslibet, urgente fame*, *saliva copiosior in buccam consuat*, quin & *interdum ex ore longius profiliat*: daß einem für Appetit / oder Hunger / das Maul wässert.

Huius phænomeni, & in universum *excretionis salivæ*

salivæ in os abundantioris causam complures recentiorum Physiologorum a *mechanismo masticationis*, & succedente hinc salivalium glandularum compressione satagunt deducere: Verum enim vero quoniam *sepe citra ullum antecedentem aut comitantem masticationis actum ista salivæ proritatio contingit*, alia omnino ipsius ostendi debet ratio. Neque vero hæc admodum obscura esse poterit consideranti, *prævium istum affectum, & vehementem complacentis alimenti appetitum*, ab anima sic determinatum, ut ipso exurgente, *manifestus impetus cum valido excernendi conatu in fontibus salivæ* simul suscitetur, antevertendo quasi consuetam in masticationis & deglutitionis actu effusionem.

Hæc igitur *tam prompta & larga salivalis laticis corrivatio a masticationis* qualicunque *mechanismo* neutiquam dependet; ex adverso enim, *quando res minus sapidæ aut quadantenus ingratae, vel sola satietate tædiosa, diu etiam in ore & quam maxime commasticando versantur, deficere tamen solet salivæ effluxus, ut vel propterea deglutiri commode non possint*, quod merito animadvertendum censuit illustris *Stablius* (h)

Si cui autem fortasse displiceat simplex illa assertio, quod *anima consensu aut dissensu suo negotium istud moderetur*, is videat, num magis possit acquiescere in *Theod. Craanen* (i) (qui nihil non in œconomia humani corporis mechanice demonstrare voluit) explicatione: *Provenire, ait ipse, hanc salivæ copiam in ore ex vasis salivalibus intra os dispersis, quatenus cibi grati conspectus causat in nobis affectum animi, quo spiritus animales copiose nimis ex capite ad palatum, & oris partes*

A 2

inter.

(h) *Theor. Med.* p. 466. (i) *Tract. de homine, cap. III. p. 10.*

internas determinantur, qui suo influxu glandulas in orofitas ita comprimunt, ut succum in iis contentum exprimant & excludant.

Alias autem & tunc quoque observatur *salivæ redundantia*, quando res admodum *adverse*, & *fastidium* creantes occurrunt, vel *nausea* & *ad vomitum dispositio* adest, quo quidem in casu natura fastidiosum obiectum, sive iam inhærens ori aut ventriculo, sive extrinsecus adhuc obversans, collecto salivæ abundantis vehiculo, excipere, & remove velle videtur. Cæterum si quis paulo accuratius attenderit, is facile deprehendet, *humorem in illo fastidii casu*, (da einem für Ekel und Grauen das Maul voll Wasser laufft) *non tam e superioribus & anterioribus salivæ fontibus affluere, quam ex ipsa gula ascendere, & eructari*, motu scilicet peristaltico œsophagi evidenter inverso.

III.

Supercilium salit.

INter *divinationes* antiquitus celebratas haud infimam fuisse constat illam, a *subsultatione variarum corporis humani partium petitam*, de qua integrum tractatum reliquit *Melampus Hierogrammateus* (k), ex Aegyptiorum maxime sententia, adeo ample diffusa, ut vix ullum existat membrum, cuius tremor & saltus forte contingens, non singulare quippiam boni vel mali portendat secundum curiosam observationem istam.

Hinc

(k) sub titulo *περί παραμυν μαντικῆς πρὸς Πλωταρχίου Βασιλέα*.

Hinc *Isodoro* (l) perhibente, *salissatores vocati sunt*, qui dum eis membrorum quæcunque partes salierint, aliquid sibi exinde prosperum sive triste significari prædixerunt. *Lud. Cælius Rhodiginus* (m) autem saliatores appellari eos scribit, qui salientes oculos intuiti, odorantur præsagium. Idem affirmat hoc augurium dici palmicum, de quo *Posidonius* scripserit, ab oculi fibrata subsultatione, qualem motum Græci *παλμὸν* vocant.

Et oculi quidem dextri saltationem, sive tremorem, tanquam faustum signum commemoravit *Theocritus* (n) quemadmodum idem phænomenon in *supercilio dextro* apud *Plautum* (o) proverbii loco usurpatum legitur a servo, *auxilium argentarium* sibi hinc præfagiente.

Ad hanc ominum seriem quoque pertinent illa a *sternutamentis* & *aurium tinnitu* desumpta, ceu non solum hodieque fieri consuevit, verum etiam priscis temporibus obtinuit; certe enim *Plinius* (p) suo iam ævo receptum fuisse testatur, quod *absentes tinnitu aurium præsentire sermones de se putaverint*.

Quid vero de huiusmodi præsagiis in universum & singulatim iudicandum sit, quilibet sanæ rationis ductum sequens, & asserta ad experientiæ trutinam revocans, facillime deprehendet: sunt nempe *inania vulgi commenta*, & *superstitionis momenta*, omni firmo destituta fundamento, ut propterea *Thom. Bromnius* (q) talia præsagia merito accensuerit *erroribus popularibus*. Quin etiam *August. Niphus* (r), posteaquam omnia, quæ *Melampus*, *Phæmon*, *Antiphon* & *Aegyptii de saltibus*

(l) *Lib. VIII cap. IX.* (m) *Leß. antiqu. Lib. VII. cap. XXIX.* (n) in *Amaryllide.* (o) *Pseudol. Act. I. Sc. I. v. 105.* (p) *Lib. XXVIII cap. II.* (q) *Pseudodox. Epidem. Lib. V. cap. XXI.* (r) *de Auguriis Lib. I. & II.*

tibus tremoribusque Variarum corporis partium auguralibus tradiderunt, prolixè recensuit, tandem ingenue fatetur, sternutamenta, saltus, resque alias naturales, quæ propriis naturis creduntur ferre hominibus auguria, superstitiosa & vana esse, & semetipsum, licet ista sæpissime ac multis temporibus observaverit, nihil unquam veri reperisse.

Cum interim talia frequenter accidunt *motuum subitaneorum in his illis partibus genera*, nullam tamen video necessitatem, cur *supernaturalis vel causa vel effectus* iisdem assignari debeat: siquidem *oculorum, superciliorum, genarum, aliarumve partium improvisa* licet *palpitatio*, a spirituum in fibris motricibus inæquali motu & agitatione, leviolem spasmi aliquem ciente, oriri facile potest, perinde ac *sternutamentum* a particulis utcunque acribus, & interiorem narium membranam irritantibus, sive a capite destillantibus, sive ab extra susceptis; *sonitus vero auris* a vapore vel conclusi intus aeris expansione, vel alia denique causa tympanum nervumque acusticum tendente & premente.

IV.

Nil prodest oculis.

Germanorum hoc esse proverbium, rectè affirmat Ioh. Baptista Montanus (s). Admodum enim vulgare habetur axioma vel dictærum: Nichts ist gut für die Augen. Quo ipso non solum indigitatur, *quam periculose sint oculorum curationes*, & quod sæpe consultius

salutius ab iisdem abstinetur, sed etiam *alio sensu* commendatur *usus eximii alicuius remedii ophthalmici*.

Est nimirum *Pompholyx*, favilla candida, quæ dum æs cum cadmia sive calaminari lapide in orichalcum coquitur, summis fornacum locis adhæret, flocculorum velleris adinstar: huic *nibili albi* nomen in pharmacopoliis hodie tribuitur, consentiente vernaculi idiomatis appellatione, sweisser Nichts / haud quidem evidenti satis etymo, nisi *materiæ illius insignem levitatem & raritatem* occasionem denominationi dedisse statuat: Nec aliena videtur Græci vocabuli *πομφόλυγος* ratio, *aquarum* nempe *bullam* denotantis.

Cæterum iam pridem a *Dioscoride & Galeno* commendata legitur *Pompholyx* inter *ocularia auxilia*, quæ absorbendo & siccando prosunt. Recipitur propterea ad varias *collyriorum* compositiones; seorsim vero prostat in pharmacopoliis *unguentum nihili ad oculos*, vulgo etiam frequenter expetitur & celebratum titulo sweiß Nichts: Salsblein.

V.

Vno collyrio omnium oculos curare.

Medicorum imperitiæ specimen hoc ipsum *paræmiæ* loco recensuit divus *Hieronymus* (t). Quo sane non immerito redarguuntur illi, qui *easdem remedium formulae*, a præceptoribus sibi commendatas, aut aliunde acceptas, indifferenter unius eiusdemque partis affectibus, nedum temperamenti & ætatis ægrotantium aliarumve circumstantiarum ratione habita, opponunt.

Ean-

(t) in præfat. Epist. ad Ephes.

Eandem imprudentiam alio modo castigavit *Galenus* (u), artifices tales assimilando *ineptis sutoribus*, qui iuxta *proverbium* ἐν καλόποδι πάντας ὑποδέσσιν, i. e. *eadem forma omnes calceant* : significat enim ὁ καλὸς περὶ formam pedis lineam (ein Schulseisten), non calceamentum, ceu minus accurate interpretatur *Erasmus*.

Omnino autem dexteritas & iudicium Medici e *tempestiva præscriptionum variatione* æstimari potest ac solet, etiam a vulgo, cui valde displicet, si, quod itidem in *proverbio* dicitur, *eadem semper chorda obraverit Medicus* : wann der Doctor immer einerley verschreibt. Quin & Pharmacopœi ansam hinc arripiunt calumniandi Medicum, quasi materiæ medicæ & compositionis remediorum exiguum haberet notitiam. Facile autem superare licebit hosce scopulos, *mutando interdum in medicamenti ingredientium rerum ordinem, aut numerum, aut dosin; vel demum adiiciendo, aut omittendo aliquid, unde color, odor, sapor quadantenus varietur.*

VI.

Reduviam curare.

In tempestivam negotii, quod minoris est momenti, tractationem, neglecto graviore, vituperat *Tullianum* istud *Adagium* (x) *reduviam curare* : significant enim *reduvia* aut *reluvia* particulas cutis, quæ circa ungues se reluunt aut resolvunt, de quibus ipsis vocabulis & eorum origine prolixius egit in Etymologico suo *Vossius*. Deprehendo autem, quod a compluribus Medicis

(u) *Therapeut. lib. IX.* (x) *Orat. pro Sext. Rosc. Amerin.*

Medicis *redu-via* confundatur cum *paronychia*, eo quidem sensu; quo hæc significat tumorem calidum ulcerosum, in extremitate digitorum vehementi cum dolore accidentem, qui vulgo *vermis digitorum* audit. Sed enim vero *Dan. Sennertus* (y) sagaciter animadvertit, longe aliud *vitium* esse *παρωνυχία* Græcorum, quatenus *redu-viæ* synonymon est illud ipsum, nempe *levissimum*, quando cutis circa unguium radices finditur, & in exiguas particulas abscedit, cum qualicunque molestia.

Et sane eadem significatio τῆς παρωνυχίας cum proverbiali usu Græcis pariter familiaris exitit; siquidem *Galenus* (z) *Sabinum* Medicum increpaturus, quod levem ob causam libros de natura humana genuinos esse *Hippocratis* negaverit, maioris tamen momenti res neglexerit, similem esse pronunciavit *Medico redu-viam* curanti in corpore *hydropico*.

VII.

Ad vivum refecare.

HOc itidem usurpavit *Tullius* (a) pro eo, quod est, rem exactius, quam sat est, ac morosius excutere, sumpta metaphora a tonsoribus, capillos aut ungues refecantibus: nam ii sæpenumero molesti sunt, dum nimium diligentes esse student. Ita recte iudicavit *Erasmus*, qui & cognatum huic adagio esse ostendit *Sophocleum* istud, *Ευρεῖν ἐν ῥέφῳ*, i. e. ad cutem usque radit.

Molestiam inde percipiendam uti nemo ignorat,

B

fic

(y) *Præx. Med. libr. V. part. III. cap. ult.* (z) in libr. II. *Hippocr. de Natur. hum. sub finem.* (a) *Libr. de Amicitia.*

hic effectus adeo strictim & ad virum factæ capillorum tonsuræ, & unguium resectionis, in respectu ad valetudinem patientis, non idem ubique, sed varius deprehenditur. Et ab unguibus quidem profunde nimium incisis periculofam inflammationem ipsamque gangrænam funestam provenisse testantur observationes, cum alibi, tum imprimis apud *Henr. ab Heers* (b) *Thom. Bartholinum* (c) & in *Ephemeridibus Acad. N. C.* (d) legendæ.

Capillorum autem rasio ad imas usque radices, quam facile noxiam inferat, quotidiana catarrhi, cephalalgie, aliorumque malorum hinc natorum exempla satis comprobant. De barbæ vero tonsura noxia, paulo rarior casus narratur a *Georg. Segero* in *epist. Bartholin.* (e) monachi scilicet *Ordinis S. Bened.* qui toties visum amiserat, quoties ex instituto regulæ barbam raserat, hac autem largiter renata, visum denuo receperat; unde superiores monasterii, neglecto regulæ vigore, concesserint, imo monuerint, ut in posterum prolixiorem barbam æger aleret. An & qua ratione capillorum incisis barbæque rasio in convalescentibus recidi vā faciat? singulari exercitatione inquisivit *Ioh. Bapt. Sitonius* (f).

E contrario pilorum tonsura ad cutem usque multis haud exiguum levamen valetudinis attulit; quemadmodum *Georg. Hanneus* (g) commemorat exemplum ducis militum, qui a diuturna cephalalgia liberatus est detonsis forte capillis, cervicem obsidentibus, repetito experimento, quoties succrescentibus ibidem pilis,

(b) *Observat. Med.* XII. (c) *Cent.* III. *Hist. anatom.* 78. (d) *Dec.* I. anno III. *observ.* 320. (e) *Cent.* III. *Epist.* LXVII. (f) *Miscell. Med. Tract.* XIII. (g) *Ephemer. Acad. N. C.* dec. II. anno VII. *obs.* 152.

pilis, doloribusque revertentibus necessitas illius imponatur. Similiter Augustiniano cuidam monacho profuit *in debilitate visus* iterata pilorum sub alis abrasio, ceu ex fide digna D. Boxbarteri narratione retulit illustris D. D. Lucas Schrœckius (h).

Tam diversi effectus eiusdem rei causam laudatus vir consiliter suspicatur in *diversa cutis diathesi*; ita ut si ex fibrillis sensibilibus constet, a novaculæ rasione eadem irritatæ, imprimis accedente externi aeris incursu liberiore, ob remotos pilos sese contrahant, sicque humores per cavernas pilorum exituri alio in loco sese effundant, noxiamque inferant; prout vicissim cutis fibrillas non adeo sensiles nacta, contractionem istam pati haud cogitur, unde humores, turbarum antea in capite authores, liberiore exitum invenientes, illud a malis perpeffis liberare valent.

De *unguium resectione*, & quanta circa ipsam opus sit circumspeditione, tanto minus attinet dicere, quanto magis vulgo etiam constat, *securius & commodius esse, ut longi relinquantur isti, quam ut strictius & ad vivum usque resecantur*, præsertim quia sic tractati, ad latera se extendere, & in cutem carnis increfcere solent, ingenti sæpe cum molestia. Rarissimis annumeranda historiis illa videtur a Ioh. Hollerio (i) breviter & nimis obscure tradita, *hydropici nempe cuiusdam, qui ad vivum resectis pedum unguibus convaluit, defluxo paulatim illuc humore, exercitii & frictionum ope.*

Cæterum *absolutæ necessitatis* aliquando esse *resectionem in corpore humano ad vivum usque*, vel sola amputa-

B 2

(b) in Schol. ad modo cit. observat. (i) de morb. intern. libr. I. cap. xxxix. in schol.

putationis membrorum, gangræna, sphacelo aut cancro corruptorum exempla docent; in huiusmodi enim casibus nonnisi in viva adhuc sanaque parte sectionem institui debere, lippis etiam & tonsoribus notum est.

VIII.

Unguis in ulcere.

ET hæc quoque *Ciceronis* est parœmia, qua is in *Clodium* invehitur, quod *populum fame iam exasperatum, concionibus insuper seditiosis in rabiem ageret.* Egregia sane allusio! Cum enim per se iam satis magnum dolorem afferre *ulcera* soleant, hunc ipsum *ab externo contactu* facile augeri nemo nescit; ut propterea *ulcus tangere* in proverbio dicatur, si quis præfens aliquod malum utcunque exasperat.

Seorsim vero *ungues facere ad doloris* aliorumque symptomatum in ulceribus *augmentum*, vulgo etiam persuasum habetur. Quid quod eousque extenditur popularis opinio, ut singulariter noxia & *venenosa quædam qualitas unguibus inesse* credatur: daß die Nägel süchtig seyn; ob quam solam certe causam celebris illa Gallorum obstetrix *Louyse Bourgeois* (k) adeo severe prohibuit *freni linguae in infantibus solutionem per ungues* (ceu vulgo consuevit) ne scilicet *mali moris ulcera* hinc oriantur.

Sed enim vero, tametsi exploratum sit, *vulnera unguibus facta, facile inflammari & suppurari*, quin & ulcera pleraque ab unguibus adhibitis *deteriora reddi*, neutiquam tamen intrinsecæ cuidam malignitati adscriben-

(k) *Sebammen-Buch P. I. c. XXV.*

scribendus videtur hic effectus, quam potius *figura* ipsorum *externæ & modo applicandi*. Cum enim *obtusio-rem* plerumque habeant *aciem*, & vel *scalpendo*, vel *pre- mendo*, vel denique *lacerando* lædant, non poterunt non maior *irritatio & humorum affluxus*, hinc *inflammatio*, dolor & gravia mala subsequi; quamvis interdum illæ *sordes, quæ sub unguium apicibus frequenter cumulantur*, *vulneribus* aut *ulceribus* immixtæ, magis *impura eadem reddere & exasperare* queant.

IX.

Hypula ulcera.

Qui se bonos viros simulant, cum improbi sint, ὑπὸ ἄλκῃ per adagium dici, autor est *Suidas* (1). Qualia vero sint hæc *ulcera*, statim apparet ex ipsius Græci vocabuli derivatione, quod scilicet ὑπὸ τῆς ἄλκῃ sub *cicatrice*, vel utcunque clausa cute saniem recon- dant. Huiusmodi *ulcera Hippocrates* (m) ad genus *pro- fundorum* ac *fistulorum*, & quæ ἐν τοῦθεν κεκοιλασμένα, i. e. *intus excavata* sunt, retulit. Germani eadem fa- tis congrue appellant *verborgene und unterföhrhige Schä- den* / quasi quod sub integritate simulata cutis, mate- riam sordidam dolose foveant.

Quemadmodum vero huius indolis *ulcera*, quo diutius latent, eo maiorem saniei copiam intra sinum suum colligunt; ita simulati amici & homines fraudu- lenti, quanto longius occultant malitiam suam, tanto potentiores ad nocendum solent evadere; unde acu- men *adagii* nostri elucescit.

B 3

Neque

(1) *Cent. XIV. Adag. 17.* (m) *Libr. de medico textu IX.*

Neque dispar est ratio utrorumque *noxam aver-
runcandi* : sicut enim *vomicae* nullam admittunt cura-
tionem, priusquam aperta cute saniem intus collectam
effuderint, eodem modo homines dolosi & inimici
dissimulati non rectius arcentur, quam detecta ipso-
rum nequitia. Interdum tamen *subitanea grandiorum
vomicarum eruptio*, & *puris abundantior effusio*, e. g.
in asperam arteriam cavumque thoracis, magnum *vite
periculum affert*, perinde ac malevolorum hominum
technæ, liberius accusatæ & proditæ, in manifestam
vim & persecutionem sæpius erumpunt.

X.

Sanato vulnere cicatrix manet.

B *Alib. Bonifacius* (n) commemorat, e *S. Athanasio*,
Medium quendam impostorem, qui compares
suos adhortatus, ut ne metuerent quamcunque
criminationem in quoscunque intendere, adiecit præ-
ceptioni sceleratæ rationem appositam : *ut enim maxi-
me*, inquit, *sanetur vulnus, manet tamen cicatrix*. Eo-
dem tendit tritissima illa impiorum parænesis : *Calu-
nniare audacter, semper aliquid hæret!*

Vix operæ est pretium confirmare id, quod nec vul-
gus ignorat, *vulnera qualibet ampliora & profundiora*,
*quin & aliquando leviora, visa, etsi caute tractentur, & ore
ipsorum studiose iungantur, relinquere tamen plagæ ali-
quod vestigium, aut colore aut inæqualitate aut utroque
simul conspicuum, quod ipsa est cicatrix.* Ad hanc ma-
turan-

(n) *Histor. ludicr. libr. XVIII. cap. 14.*

turandam minusque deformem efficiendam in usum vocari consueverunt varia remedia cuti applicanda, quæ ideo Græcis ἐπελωικά, Latine autem locuturis hodie *Cicatrisantia* dicuntur.

Bene autem noverunt Chirurgi, parum proficere talia ad *concinnitatem cicatricis*, nisi prius *labia vuln-
ris probe adducta*, & *æqualiter coniuncta* fuerint, cuius ἐγχειρήσεως neglectus tam crebro *deformes adeo*, & in ipsius artificis opprobrium superstites *cicatrices* parit.

Quamquam vero singulari molestia, ne dum periculo res ista careat, quia tamen *in facie præsertim*, tum & aliis in partibus, quæ minus occultari solent, *pulchritudinem lædit*, huius amantes sæpe non verentur expetere dolorificam licet *turpioris cicatricis extirpationem*, nil obstante *Celsi* (o) iudicio, qui *stultum esse putat*, *decoris causa*, rursum & *dolorem* & *medicinam* sustinere; cum alioquin (eodem docente) *si vel excreverit cicatrix, vel concava sit*, res utrique succurri patiatur. Siquidem utraque cicatrix exulcerari scalpello possit; si medicamentum aliquis malit, idem efficere compositiones has, quæ corpus exedunt. Cute exulcerata, super eminentem carnem exedentia medicamenta conii-cienda esse, super concavam implentia, donec utrumque ulcus sanæ cuti æquetur, & tum cicatrix iuducatur.

Veruntamen cum constet, *eminentes* quasdam *cicatrices*, scalpellis & causticis remediis ablatas, *recrudescere*, his maxime *ustionem* convenire ostendit *M. A. Severinus* (p) eiusque optatum eventum in diversis personis se observasse testatur.

XI.

(o) Lib. V, cap. 26, artis. ult. (p) de efficaci Med. p. m. 272.

XI.

Chironium ulcus.

QUod hoc in proverbio locum habeat, pro re desperata & immedicabili, nullum est dubium: unde vero natum sit, de eo controversatur. Galenus (q) etenim ortum existimat a Chironis Centauri peritia in medendo, & quod ipse primus sanaverit difficilem istam ulceris speciem: cui Paul. Aegineta (r) consentit, Chironia nempe ulcera appellari in veterata, & quæ cicatricem vix recipiant, quasi Chirone medicinæ peritissimo indigentia.

Zenobius (s) autem perhibet, Chironem ab Hercule percussum iaculo in pede, ulcus insanabile hinc accepisse; quamvis idem & Suidas (t) ex diuturna & frequenti statione hoc etiam evenisse Chironi affirmant. Plinius certe (u) ac Diodorus Siculus (x) Chironem ab Hercule sagitta vulneratum commemorant; quam deinde plagam in ulcus curatu difficile ac diuturnum abiisse, & hinc proverbio datam esse occasionem verosimile videtur.

Quicquid tandem de ipsius origine statuatur, perinde nobis est, qui hoc saltem agimus, ut, qualis speciatim sit ulceris illius conditio, declaremus, & quidem Celsi (y) eloquio: Chironium ulcus appellatur, quod & magnum est, & habet oras duras, callosas, tumentes. Exit sanies non multa, sed tenuis: odor malus, neque

17

(q) de methodo med. lib. II. cap. II. (r) libr. IV. cap. XLVI. (s) Cent. IV. Adag. XLVI. (t) Cent. XIV. Proverb. LXVIII. (u) H. N. lib. XXV. cap. VI. (x) lib. IV. cap. XII. (y) Lib. V. c. XXV III. artic. ult.

in ulcere, neque in eius tumore ulla est inflammatio: dolor modicus est. Nihil serpit, ideoque nullum periculum adfert: sed non facile sanescit. Interdum tenuis cicatrix inducitur, deinde iterum rumpitur, ulcusque renovatur. Fit maxime in pedibus & cruribus.

Ex hac eleganti sane & accurata descriptione liquido satis apparet, *ulcus* quondam *Chironium* dictum fuisse quidem *κακόνδεσ*, non autem ex genere *Φαγεδαμνικῶν* sive *depascentium ulcerum*, quibus id annumeravit *Galenus*. Cæterum idem *ulcus*, quod *Chironium* quondam vocabatur, *Telephium* quoque nuncupatum, quod ab *Achille sauciatus Telephus*, in tali hinc nato ulcere consenuerit, præ cæteris *Aegineta* l. c. clare ostendit; plura vero huc spectantia desideranti suppedietabit *Rob. Keuchenius* (z).

XII.

Invulneratus uti Caneus.

Diversæ sunt Poetarum & Mythologorum de *Cæneo* narrationes, quomodo ipse factus ex muliere vir, Neptuni beneficio obtinuerit, *ut sauciari nullo modo potuerit*: cum enim multis pugnis interfuisset, *nunquam tamen vulneratus* inde perhibetur, nedum quidem, cum una cum *Lapithis* contra *Centauros* pugnans obiit: Nam comprehensum ipsum, terra tantum obruerunt, sicque vitam finiit. Hinc *Lapithæ* dicebant, cum sublatum eius *cadaver invulneratum* toto corpore invenissent; *Cæneus cum tota vita invulnerabilis fuit, tum invulneratus obiit.*

Hæc fabulæ summa est; cuius occasione possemus tantisper excurrere ad vexatam illam hodiernum quæ-
tionem,

stionem, an & quousque possibile sit, ut quis corpus suum a vulneribus tutum & impenetrabile præstet!

Non desunt equidem id affirmantes, variaque auxilia & amuleta commendantes, quorum naturalis energia, & singularis, occulta licet virtus effectum illum sine omni magiæ prohibitiæ & Satanicæ concursu producat; cuiusmodi nonnulla paulo curiosius recensuit Iob. Ernest. Burggravius in Achille *πρόπαις*, ex quo deinceps Iob. Staricius libelli sui, multis nugis & superstitionibus referti, vernaculo idiomate (sub titulo *Heldenschatz*) divulgati, primas quasi lineas duxit. Prolixiorem vero talium rerum, quibus telorum in corpus humanum impetus inefficax reddi, & hoc adeo contra illa indurari posse creditur, catalogum contexuit Iac. Wolffius (a), ita tamen, ut omnia & singula, quomodocunque a variis deprædicata & excusata, tam experientiæ quam rationi, inprimis autem Christianæ fidei repugnare pronunciaverit; in quo prudenti pioque iudicio nos acquiescimus.

Cæterum bene habet, quod istiusmodi artibus operam dantes, sub quocunque etiam *naturalis magiæ* prætextu, non tolerentur in virorum honestorum societate, sed velut infames arceantur, quin & tanquam *nefarie magiæ rei*, capitis quoque in periculum incurrant.

XIII.

Aspidis morsus.

QVo notior fuit olim ex genere serpentum *aspis*, eo obscurior eadem hodie existit, adeo quidem, ut diligentissimus alias animantium serpentine generis observator Iob. Raius (b) neque nominis probabilem

(a) *Scrutin. Amulet. med.* p. 147. (b) *Synops. animal.* p. 288.

lem rationem, neque descriptionem accuratam *Aspidis* dare se posse fateatur.

Ex antiquis autem scriptoribus cognoscere utique licet, *integrum quasi genus* ab ipsis constitutum fuisse *aspidis* nomine. *Galenus* (c) equidem tres tantum species enumerat; *Aelianus* (d) vero Aegyptios in sedecim species divisisse idem genus perhibet. Vtut autem in definiendo numero-variant, & in forma distinctim describenda deficient, (si *Nicandrum* (e) cæteris paulo clarius edifferentem, excipias) in hoc tamen convenire videntur omnes, *quod morsus aspidis periculosissimus, quin ipsius viperæ morsu nocentior sit, & ordinarie paucarum horarum intervallo perimat*; quare is in parœmia pro *insanabili læsione* celebratur.

Symptomata huius morsus eadem fere a singulis autoribus memorantur, quod nempe inflictum *vulnus exiguum*, velut acu factum, *non intumescat, nec admodum doleat*, paucumque sanguinem atrum emittat, quod per corpus *vagi dolores, oculorum caligo, capitis gravitas, torpor & veternus* accedant, mortis ut plurimum prodromi.

Duo autem præcipue in veterum commentariis non æque consentaneæ veritati videntur; primum, *quod aspidis, teste Galeno, quædam species detur*, ideo *ἄβας* nuncupata, *quæ citra morsum, proiciendo tantum salivam, possit occidere*; quo modo *Cleopatra* periisse fertur; deinde, *quod aspidis venenum natura sit frigidum, & coagulando sanguinem interficiat*.

Priori enim asserto communis reclamationis experientia, quæ docet, non facile, aut saltem non tam velociter,

C 2

nec

(c) de *Tberiaca* ad *Pis.* c. viii. (d) *Lib. x. de animal. c. xxxi.* (e) *Tberiac. p. m. 11. sqq.*

nec tanta vi penetrare per integram cutem in corpus ulla venena, uti de *aspide* affi- matur. Obstant etiam exempla quondam notata *Psyllorum*, sive hominum quodcunque virus ab animantibus venenosis infusum ore exurgentium, sine ullo quidem suæ vitæ periculo. Alteram assertionem vel sola infringit *Celsi* (f) auctoritas & observatio de salutari usu *aceti*, quem demonstrasse dicitur casus cuiusdam pueri, qui cum *aspide* ictus esset, & partim ob ipsum vulnus, partim ob immodicos æstus siti premeretur, ac locis siccis alium humorem non reperiret, *acetum*, quod forte scum habebat, ebibit, & liberatus est. Quoniam vero, ex unanimi sententia optimorum hodie Medicorum, refrigerando potius & coagulando *acetum* operatur, non poterit profecto mederi *aspidis veneno*, si hoc pariter sanguinem coagulando noceret; ut propterea *Celsus* sine necessitate ad virtutem dissipandi, quam cum facultate refrigerandi simul possideret *acetum*, confugiat. Nobis certe ista animalium venena, velocem & principium vitale destruentem putredinem magis, quam coagulationem sanguinis inferre videntur.

XIV.

Extremum occupet scabiēs.

VARIÆ quondam in usu fuerunt formulæ exsecrandi aut male precandi, quas inter hæc etiam, vix alibi quam apud *Horatium* (g) legenda occurrit:

Occupet extremum scabies, mihi turpe relinqui est.

Idem pueros olim cursu certantes clamare solitos, eademque voce commilitones suos adhortatos fuisse narrat *Erasmus*.

Haud admodum gravis, sed iocosa magis videri poterit hæc imprecatio consideranti, quod antiquitus etiam in adagio dicta fuerit *Herculanæ scabies*, pro re parum molesta; siquidem *Hercules* labore fatigatus, instituto a *Nymphis* balneo, mitem valde scabiem soloque pruritu incommodam suscepisse fertur.

Norunt autem in re medica vel leviter versati, quod præter benignam illam, sive humidam, sive siccam scabiem, sæpe etiam accidat gravior, mali moris, foeda, diuturna & lepræ proxima, diversis nominibus appellata, qualem hosti quoque insensibilissimo imprecari velle piaculum foret.

Cæterum nos benevolo Adagiorum nostrorum Lectori cuivis, tam primo quam postremo, sive circa primas sive extremas eorum lineas occupato, ne *Herculanæ* quidem scabiæ iucundam pruriginem, sed quodlibet iucundius & optatius precamur.

(f) Lib. V, cap. XXVII. artic. IV. (g) de Arte Poet. vers. 417.